


瑜伽師地論

第二十七

二百廿五  
禍七

49017

1 ( ) r



British Library  
Acquisition Department  
96 Euston Road  
London NW1 2DB  
UK



瑜伽師地論卷第二十七

禍

彌勒菩薩說

沙門

玄奘奉

詔譯

本地分中聲聞地第十三

第二瑜伽處之二



云何緣性緣起所緣謂於三世唯行唯法唯  
事唯因唯果墮正道理謂觀待道理作用道  
理證成道理法爾道理唯有諸法能引諸法  
無有作者及以受者是名緣性緣起所緣於  
此所緣作意思惟癡行增上補特伽羅所有  
癡行皆得微薄於諸癡行心得清淨是名緣  
性緣起所緣



云何界差別所緣謂六界差別一地界二水

界三火界四風界五空界六識界云何地界  
地界有二一內地界者謂此身中內  
別堅性堅韌所攝地地所攝親附執受外地  
界者謂外堅性堅韌所攝地地所攝非親附  
非執受又內地界其事云何謂髮毛爪齒塵  
垢皮肉骸骨筋脉肝膽心肺脾腎肚膈大腸  
小腸生藏熟藏及糞穢等名內地界又外地  
界其事云何謂瓦木塊礫樹石山巖如是等  
類名外地界云何水界水界有二一內二外  
內水界者謂此身中內別濕性濕潤所攝水  
水所攝親附執受其事云何謂淚汗淚唾肪  
膏脂髓熱淡膿血腦膜尿等名內水界外水

界者謂外濕性濕潤所攝水水所攝非親附  
非執受其事云何謂井泉池沼陂湖河海如  
是等類名外水界云何火界火界有二一內  
二外內火界者謂此身中內別溫性溫熱所  
攝煖煖所攝親附執受其事云何謂於身中  
所有溫煖能令身熱等熱遍熱由是因緣所  
食所飲所噉所嘗易正消變彼增盛故墮蒸  
熱數如是等類名內火界外火界者謂外溫  
性溫熱所攝煖煖所攝非親附非執受其事  
云何謂於人間依鑽燧等牛糞末等以求其  
火火既生已能燒牛糞或草或薪或榛或野  
或山或渚或村村分或城城分或國國分或

復所餘如是等類名外火界云何風界風界  
有二一內二外內風界者謂此身中內別風性  
風飄所攝輕性動性非親附非執受其事云何  
謂內身中有上行風有下行風有脇卧風有  
脊卧風有腰間風有臆間風有小刀風有大  
刀風有針刺風有畢鉢羅風有入出息風有  
隨支節風如是等類名內風界外風界者謂  
外風性風飄所攝輕性動性非親附非執受  
其事云何謂在身外有東來風有西來風有  
南來風有北來風有有塵風有無塵風有狹  
小風有廣大風有毗濕婆風有吠藍婆風有  
風輪風有時大風卒起積集折樹頽牆崩山

蕩海旣飄鼓已無所依憑自然靜息若諸有情欲求風者動衣搖扇及多羅掌如是等類名外風界云何空界謂眼耳鼻口咽喉等所有孔穴由此吞吐於此吞吐旣吞吐已由此孔穴便下漏泄如是等類說名空界云何識界謂眼耳鼻舌身意識又心意識三種差別是名識界若諸慢行補特伽羅於界差別作意思惟便於身中離一合想得淨想無復高舉憍慢微薄於諸慢行心得清淨是名慢行補特伽羅由界差別淨行所緣云何阿那波那念所緣謂緣入息出息念是名阿那波那念此念所緣入出息等名阿那波那念所

緣當知此中入息有二何等爲二一者入息  
二者中間入息出息亦二何等爲二一者出  
息二者中間出息入息者謂出息無間內門  
風轉乃至齋處中間入息者謂入息滅已乃  
至出息未生於其中間在停息處暫時相似  
微細風起是名中間入息如入息中間入息  
出息中間出息當知亦爾此中差別者謂入  
息無間外門風轉始從齋處乃至面門或至  
鼻端或復出外入息出息有二因緣何等爲  
二一牽引業二齋處孔穴或上身分所有孔  
穴入息出息有二所依何等爲二一身二心  
所以者何要依身心入出息轉如其所應若



唯依身而息轉者入無想定入滅盡定生無  
想天諸有情類彼息應轉若唯依心而息轉  
者入無色定生無色界彼息應轉若唯依身  
心而轉非如其所應者入第四靜慮若生於  
彼諸有情類及羯羅藍頰部曇闍尸等位諸  
有情類彼息應轉然彼不轉是故當知要依  
身心入出息轉如其所應入息出息有二種  
行何等爲二一者入息向下而行二者出息  
向上而行入息出息有二種地何等爲二一  
麤孔穴二細孔穴云何麤孔穴謂從齊處孔  
穴乃至面門鼻門復從面門鼻門乃至齊處  
孔穴云何細孔穴謂於身中一切毛孔入息

出息有四異名何等爲四一名風二名阿那波那三名入息出息四名身行風名一種是風共名餘之三種是不共名修入出息者有二過患何等爲二一太緩方便二太急方便由太緩方便故生起懈怠或爲惛沉睡眼纏擾其心或令其心於外散亂由太急方便故或令其身生不平等或令其心生不平等云何令身生不平等謂強用力持入出息由入出息被執持故便令身中不平風轉由此最初於諸支節皆生戰掉名能戰掉此戰掉風若增長時能生疾病由是因緣於諸支節生諸疾病是名令身生不平等云何令心生不

平等謂或令心生諸散亂或爲極重憂惱逼切是名令心生不平等又此阿那波那念應知略有五種修習何等爲五一筭數修習二悟入諸蘊修習三悟入緣起修習四悟入聖諦修習五十六勝行修習云何名爲筭數修習謂略有四種筭數修習何等爲四一者以一爲一筭數二者以二爲一筭數三者順筭數四者逆筭數云何以一爲一筭數謂若入息入時由緣入出息任念數以爲一若入息滅出息生出向外時數爲第二如是展轉數至其十由此筭數非略非廣故唯至十是名以一爲一筭數云何以二爲一筭數謂若入

息入而已減出息生而已出爾時摠合數以  
爲一即由如是筭數道理數至其十是名以  
二爲一筭數入息出息說名爲二摠合二種  
數之爲一故名以二爲一筭數云何順筭數  
謂或由以一爲一筭數或由以二爲一筭數  
順次展轉數至其十名順筭數云何逆筭數  
謂即由前二種筭數逆次展轉從第十數次  
九次八次七次六次五次四次三次二次數  
其一名逆筭數若時行者或以一爲一筭數  
爲依或以二爲一筭數爲依於順筭數及逆  
筭數已串修習於其中間心無散亂無散亂  
心善筭數已復應爲說勝進筭數云何名爲

勝進筭數謂或依以一爲一筭數或依以二爲一筭數合二爲一而筭數之若依以一爲一而筭數者即入息出息二合爲一若依以二爲一而筭數者即入息出息四合爲一如是展轉數乃至十如是後後漸增乃至以百爲一而筭數之由此以百爲一筭數漸次數之乃至其十如是勤修數息者乃至十十數以爲一漸次數之乃至滿十由此以十爲一筭數於其中間心無散亂齊此名爲已串修習又此勤修數息念者若於中間其心散亂復應退還從初數起或順或逆若時筭數極串習故其心自然乘住運道安住入息出

息所緣無斷無間相續而轉先於入息有能  
取轉入息滅已於息空位有能取轉次於出  
息有能取轉出息滅已於息空位有能取轉  
如是展轉相續流注無動無搖無散亂行有  
愛樂轉齊此名爲過筭數地不應復數唯於  
入息出息所緣令心安住於入出息應正隨  
行應審了達於入出息及二中間若轉若還  
分位差別皆善覺了如是名爲筭數修習又  
鈍根者應爲宣說如是息念筭數修習彼由  
此故於散亂處令心安住令心愛樂若異筭  
數入出息念彼心應爲惛沉睡眠之所纏擾  
或應彼心於外馳散由正勤修數息念故彼

皆無有若有利根覺慧聰俊不好乘此筭數  
加行若爲宣說筭數加行亦能速疾無倒了  
達然不愛樂彼復於此入出息緣安任念已  
若是處轉若乃至轉若如所轉若時而轉於  
此一切由安任念能正隨行能正了達如是  
加行有如是相於此加行若修若習若多修

習爲因緣故起身輕安及心輕安證一境性  
於其所緣愛樂趣入如是彼於筭數息念善  
修習已復於所取能取二事作意思惟悟入  
諸蘊云何悟入謂於入息出息及息所依身  
作意思惟悟入色蘊於彼入息出息能取念  
相應領納作意思惟悟入受蘊即於彼念相

應等了作意思惟悟入想蘊即於彼念若念  
相應思及慧等作意思惟悟入行蘊若於彼  
念相應諸心意識作意思惟悟入識蘊如是  
行者諸蘊中乃至多任名已悟入是名悟入  
諸蘊修習若時無倒能見能知唯有諸蘊唯  
有諸行唯事唯法彼於尔時能於諸行悟入  
緣起云何悟入謂觀行者如是尋求此入出  
息何依何緣既尋求已如實悟入此入出息  
依身緣身依心緣心復更尋求此身此心何  
依何緣既尋求已如實悟入此身此心依緣  
命根復更尋求如是命根何依何緣既尋求  
已如實悟入如是命根依緣先行復更尋求



如是先行何依何緣既尋求已如實悟入如是先行依緣無明如是了知無明依緣先行依緣命根命根依緣身心身心依緣入息出息又能了知無明滅故行滅行滅故命根滅命根滅故身心滅身心滅故入出息滅如是名爲悟入緣起彼於緣起悟入多住名善習修是名悟入緣起修習如是彼於緣起悟入善修習已復於諸行如實了知從衆緣生悟入無常謂悟入諸行是無常故本無而有有已散滅若是本無而有有已散滅即是生法老法病法死法若是生法老法病法死法即是其苦若是其苦即是無我不得自在

遠離宰主如是名爲由無常苦空無我行悟  
入苦諦又彼如是能正悟入諸所有行衆緣  
生起其性是苦如病如癰一切皆以貪愛爲  
緣又正悟入即此能生衆苦貪愛若無餘斷  
即是畢竟寂靜微妙我若於此如是了知如  
是觀見如是多住當於貪愛能無餘斷如  
是名能悟入集諦滅諦道諦於此悟入能多  
住已於諸諦中證得現觀是名悟入聖諦修  
習如是於聖諦中善修習已於見道所斷一  
切煩惱皆悉永斷唯餘修道所斷煩惱爲斷  
彼故復進修習十六勝行云何名爲十六勝  
行謂於念入息我今能學念於入息於念出

息我今能學念於出息若長若短於覺了遍  
身入息我今能學覺了遍身入息於覺了遍  
身出息我今能學覺了遍身出息於息除身  
行入息我今能學息除身行入息於息除身  
行出息我今能學息除身行出息於覺了喜  
入息我今能學覺了喜入息於覺了喜出息  
我今能學覺了喜出息於覺了樂入息我今  
能學覺了樂入息於覺了樂出息我今能學  
覺了樂出息於覺了心行入息我今能學覺  
了心行入息於覺了心行出息我今能學覺  
了心行出息於息除心行入息我今能學息  
除心行入息於息除心行出息我今能學息

除心行出息於覺了心入息我今能學覺了  
心入息於覺了心出息我今能學覺了心出  
息於喜悅心入息我今能學喜悅心入息於  
喜悅心出息我今能學喜悅心出息於制持  
心入息我今能學制持心入息於制持心出  
息我今能學制持心出息於解脫心入息我  
今能學解脫心入息於解脫心出息我今能  
學解脫心出息於無常隨觀入息我今能學  
無常隨觀入息於無常隨觀出息我今能學  
無常隨觀出息於斷隨觀入息我今能學斷  
隨觀入息於斷隨觀出息我今能學斷隨觀  
出息於離欲隨觀入息我今能學離欲隨觀  
入息於離欲隨觀出息我今能學離欲隨觀

入息於離欲隨觀出息我今能學離欲隨觀  
出息於滅隨觀入息我今能學滅隨觀入息  
於滅隨觀出息我今能學滅隨觀出息問如  
是十六差別云何答有學見迹已得四念住  
等於入出息所緣作意復更進修為斷餘結  
是故念言於念入息我今能學念於入息於  
念出息我今能學念於出息若緣入息出息  
境時便作念言我今能學念長入息念長出  
息若緣中間入息中間出息境時便作念言  
我今能學念短入息念短出息如入息出息  
長轉及中間入息中間出息短轉即如是了  
知如是名為若長若短若緣身中微細孔穴

入息出息周遍隨入諸毛孔中緣此為境起  
勝解時便作念言我於覺了遍身入息出息  
我今能學覺了遍身入息出息若於是時或  
入息中間入息已滅出息中間出息未生緣  
入息出息空無位入息出息遠離位為境或  
出息中間出息已滅入息中間入息未生緣  
出息入息空無位出息入息遠離位為境即  
於此時便作念言於息除身行入息我今能  
學息除身行入息於息除身行出息我今能  
學息除身行出息又即於此若修若習若多  
修習為因緣故先未串習入出息時所有剛  
強苦觸隨轉今已串習入出息故皆得息除

有餘柔輒樂觸隨轉便作念言於息除身行  
入息我今能學息除身行入息於息除身行  
出息我今能學息除身行出息又於如是阿  
那波那念勤修行者若得初靜慮或得第二  
靜慮時便作念言於覺了喜入息出息我今  
能學覺了喜入息出息若得離喜第三靜慮  
時便作念言於覺了樂入息出息我今能學  
覺了樂入息出息第三靜慮已上於阿那波  
那念無有更修加行道理是故乃至第三靜  
慮宣說息念加行所攝又即如是覺了喜者  
覺了樂者或有暫時生起忘念或謂有我我  
所或發我漫或謂我當有或謂我當無或謂

我當有色或謂我當無色或謂我當有想或  
謂我當無想或謂我當非有想非無想生起  
如是愚癡想思俱行種種動慢戲論造作貪  
愛纔生起已便能速疾以慧通達不深染著  
方便斷滅除遣變吐由是加行便作念言於  
覺了心行入息出息我今能學覺了心行入  
息出息於息除心行入息出息我今能學息  
除心行入息出息又若得根本第一第二第  
三靜慮彼定已得初靜慮近分未至依定依  
此觀察所生起心謂如實知如實覺了或有  
貪心或離貪心或有瞋心或離瞋心或有癡  
心或離癡心略心散心下心舉心有掉動心



無掉動心有寂靜心無寂靜心有等引心無  
等引心善修習心不善修習心善解脫心不  
善解脫心於如是心皆如實知如實覺了是  
故念言於覺了心入息出息我今能學覺了  
心入息出息彼若有時見為昏沉眠睡蓋覆  
障其心由極於內住寂止故尔時於外隨緣  
一種淨妙境界示現教導讚勵慶喜策發其  
心是故念言於喜悅心入息出息我今能學  
喜悅心入息出息彼若有時見為掉舉惡作  
蓋覆障其心由極於外住囂舉故尔時於內  
安住寂靜制持其心是故念言於制持心入  
息出息我今能學制持心入息出息若時於

心善修善習善及修習爲因緣故令現行蓋  
皆得遠離於諸蓋中心得清淨是故念言於  
解脫心入息出息我今能學解脫心入息出  
息彼於諸蓋障修道者心已解脫餘有睡眠  
復應當斷爲斷彼故起道現前謂於諸行無  
常法性極善精懇如理觀察是故念言於無  
常隨觀入息出息我今能學無常隨觀入息  
出息又彼先時或依下三靜慮或依未至依  
定已於奢摩他修瑜伽行令依無常隨觀復  
於毗鉢舍那修瑜伽行如是以奢摩他毗鉢  
舍那熏修心已於諸界中從彼隨眠而求解  
脫云何諸界所謂三界一者斷界二者離欲

界三者滅界見道所斷一切行斷名爲斷界  
修道所斷一切行斷名離欲界一切依滅名  
爲滅界思惟如是三界寂靜安隱無患修奢  
摩他毗鉢舍那彼由修習多修習故從餘修  
道所斷煩惱心得解脫是故念言於斷隨觀  
離欲隨觀滅隨觀入息出息我今能學斷隨  
觀離欲隨觀滅隨觀入息出息如是彼於見  
修所斷一切煩惱皆永斷故成阿羅漢諸漏  
永盡此後更無所應作事於所決擇已得究  
竟其名十六勝行修習如是名爲五種修習  
阿那波那念及尋思行補特伽羅應於是中  
正勤修學愛樂乘御若於所緣有思遽務有

散亂者於內各別應當親近如是觀行若於  
此中勤修習者尋思散動皆無所有心於所  
緣速疾安住深生愛樂是名第五多尋思行  
補特伽羅淨行所緣如是摠名淨行所緣云  
何名爲善巧所緣謂此所緣略有五種一蘊  
善巧二界善巧三處善巧四緣起善巧五處  
非處善巧蘊善巧者云何蘊云何蘊善巧謂  
蘊有五則色蘊受蘊想蘊行蘊識蘊云何色  
蘊謂諸所有色一切皆是四大種及四大種  
所造此復若過去若未來若現在若內若外  
若麤若細若劣若勝若遠若近摠名色蘊云  
何受蘊謂或順樂觸爲緣諸受或順苦觸爲

緣諸受或順不苦不樂觸爲緣諸受復有六  
受身則眼觸所生受耳鼻舌身意識觸所生受  
搃名受蘊云何想蘊謂有相想無相想狹小  
想廣大想無量想無諸所有無所有處想復  
有六想身則眼觸所生想耳鼻舌身意識觸所  
生想搃名想蘊云何行蘊謂六思身即眼觸  
所生思耳鼻舌身意識觸所生思復有所餘除  
受及想諸心法等搃名行蘊云何識蘊謂心  
意識復有六識身則眼識耳鼻舌身意識搃  
名識蘊前受想行蘊及此識蘊皆有過去未  
來現在內外等差別如前廣說是名爲蘊云  
何蘊善巧謂善了知所說蘊種種差別性非

一衆多性除此法外更無所得無所分別是  
名略說蘊善巧義云何名蘊種種差別性謂  
色蘊異受蘊異乃至識蘊異是名種種差別  
性云何名蘊非一衆多性謂色蘊非一衆多  
品類大種所造差別故去來今等品類差別  
故是名色蘊非一衆多性如是餘蘊隨其所

應皆當了知云何除此法外更無所得無所  
分別謂唯蘊可得唯事可得非離蘊外有我  
可得有常恒住無變易法是可得者亦無少  
法是我所有故除此外更無所得無所分別  
云何界云何界善巧謂界有十八則眼界色  
界眼識界耳界聲界耳識界鼻界香界鼻識

界舌界味界舌識界身界觸界身識界意界  
法界意識界是名為界若復於彼十八種法  
從別別界別別種子別別種姓生起出現如  
實了知忍可審察名界善巧如實了知十八  
種法從別別界別別而轉即於因緣而得善  
巧是故說此名界善巧云何處善巧  
謂處有十二則眼處色處耳處聲處鼻處香  
處舌處味處身處觸處意處法處是名為處  
處善巧者謂眼為增上緣色為所緣緣等無  
間滅意為等無間緣生起眼識及相應法耳  
為增上緣聲為所緣緣等無間滅意為等無  
間緣生起耳識及相應法如是乃至意為等

無間緣此生作意為增上緣法為所緣緣生  
起意識及相應法如是六識身及相應法皆  
由三緣而得流轉謂增上緣所緣緣等無間  
緣若於如是諸內外處緣得善巧名處善巧  
云何緣起云何緣起善巧謂無明緣行行緣  
識識緣名色名色緣六處六處緣觸觸緣受  
受緣愛愛緣取取緣有有緣生生緣老死乃  
至招集如是純大苦蘊是名緣起若復了知  
唯有諸法滋潤諸法唯有諸法等潤諸法唯  
有諸行引發諸行而彼諸行因所生故緣所  
生故本無而有有已散滅體是無常是無常  
故即是生法老法病法死法愁悴悲歎憂苦



惱法是生法故乃至是惱法故則名為苦。由是苦故不得自在其力羸劣。由是因緣定無有我。若於如是緣生法中由如是等種種行相善巧了達或無常智或苦智或無我智是名緣起善巧。又處非處善巧當知即是緣起善巧。差別此中差別者謂由處非處善巧故能正了知非不平等因果道理。則善不善法有果異熟。若諸善法能感可愛果異熟法。諸不善法能感非愛果異熟法。若能如是如實了知名處非處善巧。此五善巧略則為二。一自相善巧。二共相善巧。由蘊善巧顯自相善巧。由餘善巧顯共相善巧。如是總名善巧所

緣云何淨惑所緣謂觀下地麤性上地靜性  
如欲界對初靜慮乃至無所有處對非想非  
非想處云何麤性謂麤性有二一體麤性二  
數麤性體麤性者謂欲界望初靜慮雖皆具  
五蘊而欲界中過患深重苦住增上最為鄙  
劣甚可厭惡是故說彼為體麤性初靜慮中  
則不如是極靜極妙是故說彼為體靜性數  
麤性者謂欲界色蘊有多品類應知應斷如  
是乃至識蘊亦尔是故說彼為數麤性如是  
上地展轉相望若體麤性若數麤性隨其所  
應當知亦尔如是麤性於諸上地展轉相望  
乃至極於無所有處一切下地苦惱增多壽

量減少一切上地苦惱減少壽量增多非想  
非非想處唯靜唯妙更無上地勝過此故以  
要言之有過患義是鹿性義若彼彼地中過  
患增多即由如是過患增多性故名爲鹿性  
若彼彼地中過患減少即由如是過患減少  
性故名爲靜性此是世間由世俗道淨惑所  
緣何以故彼觀下地多諸過患如病如癰猶  
如毒箭不安隱性以爲鹿性觀於上地與彼  
相違以爲靜性斷除下地所有煩惱始從欲  
界乃至上極無所有處此是暫斷非究竟斷  
以於後時更相續故出世間道淨惑所緣復  
有四種一苦聖諦二集聖諦三滅聖諦四道

聖諦云何苦聖諦謂生苦老苦病苦死苦怨  
憎會苦愛別離苦求不得苦略說一切五取  
蘊苦名苦聖諦云何集聖諦謂若愛若後有  
愛若喜貪俱行愛若彼彼喜樂愛等名集聖  
諦云何滅聖諦謂即此愛等無餘斷滅名滅  
聖諦云何道聖諦謂八支等聖道名道聖諦  
當知此中依黑品白品果因建立故建立四  
聖諦謂苦諦是黑品果集諦是黑品因滅諦  
是白品果道諦是白品因能得能證故又苦  
諦如病初應遍知集諦如病因緣次應遠離  
滅諦如無病次應觸證道諦如良藥復應修  
習及多修習又苦諦苦義乃至道諦道義是

如是實非不如實是無顛倒非是顛倒故名  
為諦又彼自相無有虛誑及見彼故無倒覺  
轉是故名諦問何故諸諦唯名聖諦答唯諸  
聖者於是諸諦同謂為諦如實了知如實觀  
見一切愚夫不如實知不如實見是故諸諦  
唯名聖諦又於愚夫唯由法尔說名為諦不  
由覺悟於諸聖者俱由二種又生苦者諸於  
生時發生種種身心苦受非生自體即是其  
苦為苦因緣故名為苦廣說乃至求不得苦  
謂由所求不得因緣發生種種身心苦受非  
求不得體即是苦為苦因緣故名為苦如是  
當知略說一切五取蘊苦謂由生等異門

顯了苦苦由此五取蘊苦亦顯了所餘壞苦  
行苦所以者何如五取蘊具攝三受如是能  
與如前所說苦苦為器當知此中亦即具有  
前所未說壞苦行苦問何故世尊苦苦一種  
以自聲說壞苦行苦以異門說答於苦苦中  
若凡若聖一切等有苦覺慧轉又苦苦性極  
可厭患又從先來未習慧者纔為說時則便  
易入又於諸諦今所調伏可化有情易得入  
故云何建立三種苦性謂先所說生苦乃至  
求不得苦即顯苦受及所依處為苦苦性如  
是名為建立苦苦性諸有是彼所對治法謂  
少是老所治無病是病所治命是死所治親

愛合會是怨憎會所治非愛別離是愛別離  
所治所求稱遂是求不得所治復有苦受及  
所依處所起煩惱復有無病等順樂受處等  
及彼所生受所起煩惱如是揔說為壞苦性  
此中樂受及所依處由無常故若變若異受  
彼增上所生眾苦若諸煩惱於一切處正生  
起時纏縛其心令心變壞即生眾苦故名壞  
苦如世尊言入變壞心執丹邑手乃至廣說  
又如說言住貪欲纏領受貪欲纏緣所生身  
心憂苦如是住瞋恚昏沉睡眠掉舉惡作疑  
纏領受彼纏緣所生身心憂苦由此至教第  
一至教諸煩惱中苦義可得壞義可得故說

煩惱為壞苦性如是名為建立壞苦性若行  
苦性遍行一切五取蘊中以要言之除苦苦  
性除煩惱攝變壞苦性除樂受攝及所依處  
變壞苦性諸餘不苦不樂受俱行若彼所生  
若生彼緣若生任器所有諸蘊名行苦性由  
彼諸蘊其性無常生滅相應有一切取三受  
麤重之所隨逐不安隱攝不脫苦苦及以壞  
苦不自在轉由行苦故說名為苦如是名為  
建立行苦性又即彼愛亦名希求亦名欣欲  
亦名喜樂即此希求由三門轉謂希求後有  
及希求境界若希求後有名後有愛希求境  
界復有二種謂於已得境界有喜著俱行愛



若於未得境界有希求和合俱行愛當知此  
中於已得境界喜著俱行愛名喜貪俱行愛  
於未得境界希求和合俱行愛名彼彼喜樂  
愛滅有二種一煩惱滅二所依滅道有二種  
一有學道二無學道如是當知名出世道淨  
惑所緣如是已說四種所緣一遍滿所緣二  
淨行所緣三善巧所緣四淨惑所緣  
云何教授謂四教授一無倒教授二漸次教  
授三教教授四證教授云何無倒教授謂無  
顛倒宣說法義令其受持讀誦修學如實出  
離正盡衆苦作苦邊際如是名為無倒教授  
云何漸次教授謂稱時機宣說法義先令受

持讀誦淺近後方令彼學深遠處又為令入  
初諦現觀先教苦諦後集滅道又為令得靜  
慮等至先教最初靜慮等至後教其餘靜慮  
等至如是等類應知名為漸次教授云何教  
教授謂從尊重若似尊重達解瑜伽軌範親  
教或諸如來或佛弟子所聞正教即如其教  
不增不減教授於他名教教授云何證教授  
謂如自己獨處空閑所得所觸所證諸法為  
欲令他得觸證故方便教授名證教授復有  
諸相圓滿教授其事云何謂由三種神變教  
授三神變者一神境神變二記說神變三教  
誠神變由神境神變能現種種神通境界令

他於己生極尊重由彼於己生尊重故於屬  
 耳聽瑜伽作意極生恭敬由記說神變能尋  
 求他心行差別由教誠神變如根如行如所  
 悟入為說正法於所修行能正教誠故三神  
 變能攝諸相圓滿教授

瑜伽師地論卷第二十七

禍

鞭吾更去反塊樂上傾對反沼陂上之小反

鑽燧上子官反捺助巾音頹徒回音咽喉

吞咽下音漏卮下音頰部曇上於古串患

煙音反

